

JESUS ANAM LAZARUS ESET KE MKPA

John 11:1-46

ỌYỌHỌ UKPEP-ŃKPỌ 145

Eke Mkparawa

IKỌ IBUOT: “Ami ndi eriset ye uwem: owo eke ọbuọtde idem ye Ami, okposuk edi nte enye ama akpa, enye eyedu uwem” (John 11:25).

Udọñọ

Jesus ama aka ke ufọk Mary, Martha, ye Lazarus. Martha ekesin idem ke ndinam udia nnọ Jesus (Luke 10:40). Edi Mary eketie ke ukot Jesus man ekpep ńkpọ oto Enye (Luke 10:39). Ke nsuhoridem, Mary ama eyet ukot Jesus ye nsọñ-urua aran (John 12:3). Edi akpanikọ nte ke Jesus ama esidu ye mbon ufọk emi ke ediwak ini, koro Enye akamade mmọ.

Kpa ke esit ufọk emi ekekamade Jesus esen ye ke uwem owo emi Jesus akamade, udọñọ ama oduk edi. Imokot ke Ecclesiastes 9:2, ite, “Kpukpru ńkpọ ewọrọ kpukpru owo ukem-ukem.” Udọñọ ifikke mmọ emi mibakke Abasi ikpọñ, mme mmọ eke edide nditọ Abasi ekeme ndidọñọ ńko. Ke ini anditiene-Christ ọdọñode, enye ọbuọt idem ye Ọbọñ man ọkọk enye nte Ẹwẹd Abasi etemede enye ndinam. “Nte owo okut ukut ke otu mbufo? Yak enye ọbọñ akam. . . . Nte owo ọdọñọ ke otu mbufo? Yak enye okot mbiowo ufọk Abasi; mmọ enyuñ enuhọ efuk enye ebọñ akam, eda aran eyet enye ke enyiñ Ọbọñ: ndien akam mbuọtidem eyenyaña enye emi ọdọñode, Ọbọñ eyenyuñ anam enye adaha ada” (James 5:13-15).

Ke ini Lazarus ọkọdọñode, nditọ eka esie iban ema edọñ eketiñ enọ Jesus, ukem nte nnyin isinamde ke ini ibọñde akam. Jesus ama etiñ ọnọ mbet Esie ete ke udọñọ Lazarus edi man ayarade ubọñ Abasi, Enye ama etiñ ete ke udọñọ Lazarus idisuñọke ke mkpa, edi, edi, man Eyen Abasi ada ubọñ.

Edibighi

Owo ekeme ndikere ete ke Jesus ọkpọkọsọsọp aka ke ọtọ Lazarus. Oro ikedighe edinam Jesus ke ifet enye emi. Ke ofuri usen iba Enye okosuk odu ke ebiet oro Enye okodude nte nnyin ifiọkde, mbemiso enye etetiñ abaña ndika ke ọtọ Lazarus. Ekeme ndidi okoyom ndidomo mbuọtidem Lazarus ye eke nditọ eka esie iban. Nnyin ifiọkke mme Jesus ama ọdọñ utom ọnọ mmọ, edi edibighi Esie ikowutke ite ke enye idikaha. Edi akpanikọ nte ke Christ ndikebighi ndika, ama ada ubọñ emi okokponde akan nte emi Lazarus ọkpọkọbode erikọk ke ndo-ndo oro enye ọkọdọñode. Jesus eketiñ ete ke edibighi oro ekedi ndinam mmọ enyene mbuọtidem emi okponde akan eke akpa, ndinyuñ nnam otim ọwuhọ ke esit mmọ.

Odudu Jesus ama ekeme ndikọk udọñọ Lazarus ke adaña ini emi Enye Jesus mikam ikaha do, koro ikọ Jesus ama anam mmọ efen ekop nsọñ-idem. Ke ini eyen-ufọk centurion ọkọdọñode, ete-ufọk esie ama aka etiene Jesus ọkọdọhọ Enye ete “Kam tiñ suk ikọ, ndien owo mi eyekop nsọñ-idem.” Jesus ama odu ke mkpaidem abaña utọ mbuọtidem centurion oro, ndien ama ọdọhọ enye ete ke eyesu ọnọ Enye kpa nte enye okonimde ke akpanikọ. Eyen-ufọk esie ama okop nsọñ-idem kpa ke ini oro. (Matthew 8:5-13). Ke ini efen, Jesus ama ọkọk udọñọ eyen-añwan kiet emi eka esie okotode Syrophenicia ke ini Enye mikam isañake ikpere eyen oro. Eka eyen oro ama aka etiene Jesus ke ntak eyen esie añwan. “Enye ekpe ye Jesus ete ebin demon osio ke idem eyen imọ” (Mark 7:26). Jesus ama okpono mbuọtidem esie onyuñ ọdọhọ enye ọnyoñ, koro “Eyen esie okop nsọñidem ọtọñode ke ini oro” (Matthew 15:28). Eka esie ama ọnyoñ ufọk okokut kpasuk ntre.

Mfin emi ńko mme owo emi eduñde ata ediwak itiat ekpọñ ufọk Abasi, emi mikemeke ndiyet mmọ aran nnyuñ mbọñ akam, ke ebọ erikọk. Mmọ esinọ ebeñe-akam, ndien nditọ Abasi ebọñ akam ebaña udọñọ mmọ. Ata ediwak owo ebọ erikọk oto ke mbuọtidem ke Jesus okposuk edi nte mmọ eduñde ke ata anyan ebiet. Edi Jesus ikanamke Lazarus eset ke utọ usuñ oro.

Jesus Ke Afanikọñ

Ke ini Jesus ọkọdọhọde mbet Esie ete ke mme imọ ika ke ọtọ Lazarus, mmọ ema efaña enyuñ eti Jesus nte mme Jew ekeyomde usuñ nditọñọ Enye ke itiat (John 8:59; 10:31), Jesus ikekereke ibaña afanikọñ adaña nte utom okodude ndinam. Ana nte enam utom Esie adaña nte ifet odude, koro Enye eketiñ ete ke okoneyo ye ekim eyedi emi owo midikemeke ndinam utom ke esit (John 9:4).

Ke ufọt ńkpọ ndik emi okodude, Jesus ama adaha aka ke ọtọ Lazarus emi ama akakpa ke emi. Jesus ama ọfiọk ete ke ekem ini ndiyarare ubọñ Abasi. Jesus ama etiñ ọnọ mbet Esie ete ke Lazarus ama ede ndien ke Imọ iyenam enye edemere ke idap mkpa. Mbet ema eka ye Jesus, ifiọkke se iditibede edi ekere ete ke mme Jew eyetọñọ Enye ye mme imọ ke itiat.

Ke Bethany

Jesus ikakaha ke ọtọ Mary ye Martha ndidọn mmọ esit ikpọn ikpọn. Enye ama enyene se ikokponde ikan oro ke esit Esie, oro ekedi ndinam utibe-ńkpọ mmenere ubọn Abasi. Ufọk mmọ okodu ke mfuhọ, koro ema ebuk Lazarus ke usen inañ emi ekebede. Ediwak ufan mmọ ema edu do ndidọn mmọ esit, edi mmọ ekeyom ufan emi ọfonde akan, kpa Jesus.

Martha ama aka ndisobo ye Jesus. Enye ama ọfiok ete ke Jesus akpakanam eyen-eka esie okukpa. Enye ama onim ke akpanikọ ete ke iyefiak ikut Lazarus ke Usen Eriset.

Jesus ọdọhọ ete, “Ami ndi eriset ye uwem: owo eke ọbuotde idem ye Ami, okposuk edi nte enye ama akpa, enye eyedu uwem.” Jesus enyene ofuri odudu ke Heaven ye ke isọn (Matthew 28:18); odudu ndinọ uwem ye odudu ndikọk udọnọ. Martha ama etiñ ete ke imonim ke akpanikọ ite Enye edi Eyen Abasi, ndien ke ntre akam Esie ekeme ndinam se ededi eke Enye ebeñede.

Martha ama adaha etiene eyen-eka esie ye etop ete ke andikpep edi, ndien ke okot enye. Mary ama adaha etiene Jesus, ndiwut mbuotidem esie ke odudu Jesus ndikọk udọnọ. Edieke Jesus okpokodude do mbemiso ini oro, Mary ọkpọkọdọhọ Enye anam udọnọ okure eyen-eka esie, edi enye ekere ete ke Jesus ama ebighi ndidi tutu ini abiara.

Mmọ ema eka ndiwut Jesus ebiet emi ekenimde Lazarus. Ke ini Jesus okutde Mary ye mmọ eken nte etuañade, mbom ama anam Enye eti eti. Enye ekedi eyen Abasi onyuñ edi owo ńko, ama owut mfuhọ Esie, onyuñ atua nte Enye asañade aka udi Lazarus.

Ke Mben Udi

Mbon mfuhọ ekeda ke mben udi Lazarus ke usen oro. Mmọ ikotimke ifiok utọ utibe-ńkpọ emi okoyomde ndida itie. Ke akpa ini mmọ ikonyimeke ye Jesus ke ini Enye ọdọhọde mmọ ekpat itiat ke inua udi efep. Mmọ ekekere ete ke ini ama ebe, ndien ke okpo Lazarus ama abiara.

Ama odu ini kiet emi Jesus mikanamke utibe-ńkpọ oto ke unana mme owo ndinim ke akpanikọ (Matthew 13:58). Ke ini ekedọhọde ete ke eyen Jarius añwan akpa, Jesus ama ọdọhọ ete esie ete, “Kufehe ndik; kam nim ke akpanikọ” (Luke 8:50). ńko ye ete eyen emi ọkọdọnọde idat, Jesus ọkọdọhọ ete, “Edieke ekemedede! Kpukpru ńkpọ ekeme ndiworo nnọ enye emi ọbuotde idem” (Mark 9:23). Odu ikọ kiet emi esitiñde ete tutu ekut ke enyin ndien enim ke akpanikọ, edi Jesus ọwọnọre oro akabare etiñ ete ke edieke mmọ enimde ke akpanikọ mmọ eyekut. Jesus eketiñ ete, “Kpukpru ńkpọ ekededi eke mbufo edibeñede ke akam edinyuñ ebuotde idem, mbufo eyenyene” (Matthew 21:22). Mme owo mfin emi eyekut ubọn Abasi nte ayararede akan edieke mmọ enyenede mbuotidem emi okponde ke Abasi.

Mme ikọ Jesus ama ọnọ mmọ emi ekedade ekanare udi Lazarus uko, ndien ema ekpat itiat efep. Jesus emenere enyin Esie ese heaven ọbọn akam, idighe akam emi Enye ebeñede se inanade, edi, edi enye emi ọnọde Abasi ekom sia Enye ama ọkọbọrọ akam Imọ ndien ke ekem ini emi Enye edibode ubọn ito mmọ emi odude do ye Enye.

Ndusuk, mbet ema eneme ke otu idem mmọ ete: “Nte Enye iketiñke ite ke Lazarus edede, ndien ke Imọ iyenam enye edemere? Nte enye iketiñke ite ke udọnọ Lazarus idighe eke mkpa? Nso ndien ke Enye eketiñ abañ, adaña emi Lazarus ama akakpa enyuñ ebuk enye?” Mmọ eyesọp ekut se Jesus eketiñde abañ.

Obufa Uwem

Mmọ ema ekop nte Jesus ofioride ke ọkpọsọn uyo ete, “Lazarus, woro di.” Mmọ ema ekut enye emi ama akakpa ke usen inañ nte ọworo de edi ye ọfọn udi esie emi ema ekebọp enye ubok ye ukot. Ke uyo Jesus, mmọ ema etat enye. Lazarus ama odu uwem ke odudu Jesus. Nso utọ idaresit ikodu ke usen oro! Mbemiso Jesus edi, ntuaña ye mfuhọ okodu. Enye ama okpuhore kpukpru esin ke idara oto ke ikọ emi Enye eketiñde. Ke akpanikọ ke ntak mbuotidem mmọ ke odudu Jesus, Lazarus ama odu uwem okposuk edi nte enye ama akakpa.

Odudu Jesus iketreke do. Ediwak owo emi ema ekekpaña ke idiok-ńkpọ (ńwed Mbon Colossae 2:13) ekop nte Jesus okotde enyiñ mmọ. Mmọ ema eworo edi edisaña ke obufa uwem (ńwed Mbon Rome 6:4). Koro mmọ ekenimde ke akpanikọ ete ke Jesus edi ediset ye uwem. Ema ebop mmọ ubok ye ukot; edi kpa nte andiwet Psalm etiñde, mmọ, ekeme ndidọhọ Jehovah “afọ amatat mi uruk” (Psalm 116:16). Se Jesus akanamde ke ikpohidem ọnọ Lazarus, Enye eyenam mfin ke ńkañ spirit.

Kpukpru mme anam-idiok ebiet Lazarus ke ini enye okodude ke udi, ekpaña, edu ke mkpọkọbi ye ke ekim. Owo emi enyañade ebiet Lazarus ke enye ama ekaset ọworo ke udi, enyene uwem. Emetat uruk idiok-ńkpọ esie. Enye odu ke uñwana onyuñ asaña ke uñwana (John 8:12).

Udọnọ Lazarus ekedi ndiyarade Ubọn Abasi. Ke akpanikọ ndinam akpa-mkpa eset okpon akan ndibiọnọ enye ndikpa. Ediwak mme Jew ema eka ndidọn Mary ye Martha esit. Mmọ edu ọtọ kiet ye mmọ eken ke mben udi. Mmọ ema ekut odudu Jesus ke ndinam utibe-ńkpọ. Ediwak ema ekut okpon akan enyuñ ebuot idem ye Jesus. Ediwak ema ekut, edi mmọ emi ekenimde ke akpanikọ ikpọn ekebọ nsinsi uwem enyene (John 3:36).

MME MBUME

1. Nso idi ntak emi Lazarus okodofode?
2. Nso ke ndito eka esie iban ekenam?
3. Lazarus akakpa ebighi adana didie?
4. Ekanam enye eset didie?
5. Nso idi ntak emi ediwak owo ekedade ekanare udi?
6. Didie ke Abasi akada ubon?
7. Nso edi ndusuk enwofode emi enwofode eno mmọ emi enimde Abasi ke akpaniko?